

आकाशवाणी

खबरां ---

1. लोकसभा चुनाएं दे दुए गेढ़ च दरमयाना ते तेज मतदान दर्ज कीता गेआ ऐ।
2. आम चुनाएं दे बाकी बचे दे चरणें लेई चुनां प्रचार जोरें-शोरें कन्नै चला करदा ऐ। मुख्ख पार्टियें दे सीनियर लीडर अपने मेदवारें दे हक्क च प्रचार करा करदे न।
3. सुप्रीम कोर्ट नै वी.वी-पैट दी पर्चियें कन्नै ई.वी.एम दे आंकड़ें गी सौ फीसदी मलाने दी मंग्ग करने आहली याचिका गी रद्द करी दिता ऐ।
4. आम चुनाएं दे 5में गेढ़ लेई नामांकन भरचे दाखल करने दा कम्म अज्ज शुरू होई गेआ ऐ।
5. रक्षा सचिव गिरिधर अरमाने होरें आतंकवाद गी उक्का बी बर्दाश्त नैई करने आहली नीति अपनाने दी जरूरत पर जोर पाया ऐ।

Polling 2nd Phase

लोकसभा चुनावें दे दुए गेढ़ लेई 12एं राज्यें ते इक केंद्र शासित प्रदेश जम्मू-कश्मीर च बड़ी मती गिनतरी च मतदान होएया। इनें 12एं राज्यें दी सीटें च 20 केरल, 14 कर्नाटक, 13 राजस्थान, उत्तर प्रदेश ते महाराष्ट्र, 8-8 मध्य प्रदेश, 6 असाम ते बिहार, 5-5ए 3-3 पच्छमी बंगाल ते छत्तीसगढ़ दियां ते इक सीट मणिपुर, त्रिपुरा ते जम्मू-कश्मीर दी शामिल ऐ। देशा दे बक्ख-बक्ख हिस्सें थमां सहाड़े संवाददाताएं दस्सेआ ऐ जे मतदाताएं गी मतदान केंद्रें च बड़ी-बड़ी रींगें च लग्गे दा दिक्खेआ गेआ ऐ। युवा ते महिला मतदाता खासे उत्साहित पाए गए। जिनें प्रमुख सियसी हस्तियें दी किस्मत ई.वी.एम च बंद होई गई ऐ, उंदे च बीजेपी दे केंद्री मंत्री राजीव चंद्रशेखर, तेजस्वी सूर्या, हेमामालिनी, अरुण गोविल, ओम बिरला ते जुगल किशोर शर्मा न। इंदे अलावा कांग्रेस दे राहुल गांधी, शशि थरूर, डी.के सुरेश ते जेपीएस दे कर्नाटक दे साबका मुखमंत्री एच.डी कुमार स्वामी शामिल न। मणिपुर लोकसभा हल्क थमां चउं मेदवारें सनें कुल 1 जहार 202 मेदवार मदान च न। इस दौरान 16 लक्ख थमां बद्ध चुनावें अधिकारिएं गी इक लक्ख 67 मतदान केंद्रें च तैनात कीता गेआ ऐ। इस दुए मरहले च 16 करोड कोलां मते

मतदाताएं अपने वोट दे अधिकार का इस्तेमाल कीता। पैहली बारी वोट पाने आले 26 लकखव मतदाताएं का पंजीकरण बी कीता गेदा ऐ।



Overall Compangning

आम चुनाएं दे बाकी बचे दे गेदें लेई चुनां प्रचार जोरें-शोरें कन्ने चला करदा ऐ। मुख्ख राजनीतिक पार्टियें दे लीडर अपने मेदवारें दे हक्क च मतदाताएं गी खिच्चने दी कोशश करा करदियां न। प्रधानमंत्री ते भारती जनता पार्टी दे सीनियर लीडर नरेंद्र मोदी होरें अज्ज पश्चिम बंगाल दे मालदा च इक जनसभा च भाषण दिता। उनें आखेआ जे तुष्टिकरण टीएमसी ते कांग्रेस बश्कार इक्क सांझी चीज ऐ, जेदे लेई ओह् किश बी करी सकदे न। उनें आखेआ जे एह् पार्टियां एनडीए दी सरकार आस्सेआ मुल्खै दी सुरक्षा लेई लैते गेदे हर इक्क फैसले गी परताना चाहंदियां न। श्री मोदी होरें आखेआ जे इक्क ओबी समां हा जेल्ले पश्चिम बंगाल भारत दे विकास दी अगुवाई करदा हा, उयां पैहले खब्बे पके आहली पार्टियें दी सरकारें ते फी टी.एम.सी दी हकूमत नै इस राज्य दी महानता गी नुकसान पजाया ते विकास गी रोकी दितां बिहार दी अररिया लोकसभा सीट पर इक सार्वजनिक सभा गी

संबोधित करदे होई प्रधानमंत्री होरें आखेआ जे एह चुनां भारत गी सामरिक ते आर्थिक तौर पर विकसित बनाडन। उनें दावा कीता जे बिहार च राष्ट्रीय जनता दल ते कांग्रेस दा गठजोड़ नां भारत दे संविधान दी परवाह करदा ऐ ते ना गै लोकवाद दी। उनें आखेआ जे इनें पार्टियों केई दहाकें तोड़ी अपने वोट नेई पान दितेत ते इंदी हकूमत दौरान मतदान केंद्रें गी अपने कब्जे च लेई लैना आम गल्ल ही। तृणमूल कांग्रेस दी अध्यक्ष ते पश्चिम बंगाल दी मुखमंत्री ममता बनर्जी हुंदा अज्ज घटाल ते झारग्राम च रैली करने दा प्रोग्राम ते होए दा ऐ। उत्तर प्रदेश च बक्ख-बक्ख राजनीतिक पार्टियों दे स्टार प्रचारक रैलियां ते रोड शा करा करदे न। मुखमंत्री योगी आदित्यनाथ हुंदा बी मुरादाबाद ते बरेली च प्रचार करने दा प्रोग्राम ऐ। दुए पाससै समाजवादी पार्टी दे प्रमुख अखिलेश यादव होरें ईटा च रैली कीती। बहुजन समाज पार्टी दे लीडर आकाश आनंद होर अम्बेडकरनगर ते कौशांबी च चुनां प्रचार करा करदे न।

<><><><><><>

Bihar-Camp

बिहार च विरोधी धड़ें आहली पार्टियों दा महागठबंधन त्रिये ते चौथे गेढ़ च चुनाएं लेई अपने मेदवारें दे हक्क च बक्ख-बक्ख रैलियां करा करदा

ऐ। विकासशील इंसाफ पार्टी दे प्रमुख मुकेश साहनी होरें झंझारपुर च मीटिंगा कीतियां ते रोड शो कीते। कांग्रेस दे प्रदेश अध्यक्ष अखिलेश प्रसाद होर बी मतदाताएं कन्नै संपर्क करा करदे न।

<><><><><><>

SC-EVM VVPAT

भारती उच्चतम अदालत नै उनें याचिकाएं गी रद्द करी दिता ऐ जेदे तैहत इलेक्ट्रनिक वोटिंग मशीनें दे आंकड़ें गी वीवी-पैट रिकार्डें कन्नै 100 प्रतिशत परतियै सत्यापित करने दी मंग कीती जा रदी ही। एह फैसला न्यायधीश, न्यामूर्ति संजीव खन्ना ते दीपांकर दत्ता हुंदी पीठ आस्सेआ दिता गया। उयां एह मामले 18 अप्रैल गी फैसले ताई आरक्षित रक्खे गेदे हे पर पीठ आस्सेआ चुनां आयोग कशा तकनीकी स्पष्टिकरणें करी इस मामले गी 24 अप्रैल लेई परतियै फेहरिस्त च रक्खेआ गेआ। चुनां आयोग आस्सेआ दिते गेदे परते गी ध्यानै च रक्खियै अज्ज फैसले सुनाए गे। फैसलें दे नतीजें दा हवाला दिंदे होई न्यामूर्ति खन्ना होरें आखेआ जे मतदान पत्रें कन्नै वोटिंग करने, ई.वी.एम-वीवी-पैट दे पूरे पराते सत्यापन ते मतदाताएं गी वीवी-पैट स्लिपां देने आली याचिका पूरी चाली खारिज करी दिती गई ऐ। उयां सुप्रीम कोर्ट नै चुनां कमीशन गी दो दिशा दिर्नेश दिते न। अदालतै

आखेआ ऐ जे ईवीएम पर सिम्बल लोड करने मगरा सिम्बल लोड करने आली युनिटै गी सील करियै डब्बें च बंद करी दिता जा। मेदवार ते उंदे प्रतिनिधि सील पर दस्तखत करडन। सील कीते गेदे डब्बे स्ट्रारग रूमस च ई.वी.एम-एं समेत नतीजे कड्डने मगरा घट्टोघट्ट 45 दिन रक्खे जान।

<><><><><><><>

Nomination 5th Phase

लोकसभा चुनाएं दे 5में गेढ़ दी अज्ज अधिसूचना जारी होने दे कन्ने नामजदगी आले कागज पत्र दाखल कराने दी प्रक्रिया शुरू होई गई ऐ। इस मरहले तैहत 6 राज्यें ते दऊ केंद्र शासित प्रदेशें दी 49 लोकसभा सीटें उप्पर मतदान होग। इन्दे च 14 उत्तर प्रदेश, 13 महाराष्ट्र, 7 पश्चमी बंगाल, 5-5 ओडिशा ते बिहार, त्रै झारखंड ते इक-इक जम्मू-कश्मीर ते लद्दाख दी सीट शामिल ऐ। इस आस्तै नामांकन 3 मई तककर कीता जाई सकदा ऐ ते इस मरहले लेई मतदान 20 मई गी होग। ओडिशा च दुए मरहले दे मतदान आस्तै बी अज्ज नामांकन भरने दा कम्म शुरू होई गेआ ऐ।

<><><><><><><>

MP-Compangning

मध्य प्रदेश च बी चुनां प्रचार जोरें-शोरें कन्नै चला करदा ऐ। केंद्री मंत्री ते भारतीय जनता पार्टी दे सीनियर लीडर अमित शाह होरें अशोक नगर ते राजगढ़ च आम जलसें च भाषण दिता। श्री शाह होरें आखेआ जे भारती जनता पार्टी दी अगुवाई आहली केंद्र सरकार मुल्खै च यूनीफार्म सिविल कोड गी लागू करग कीजे एह प्रधानमंत्री नरेंद्र मोदी हुंदी गरेंटी ऐ। उनें कांग्रेस पर अपने कन्नै दी वकालत करने दा दोष लाया। श्री शाह होरें आखेआ जे मोदी सरकार नै मुल्खै च नक्सलवाद ते आतंकवाद दा खात्मा कीता ऐ। कांग्रेस दे प्रदेश अध्यक्ष जीतू पटवारी, राज्यसभा दे सांसद विवेक तन्खाह ते साबका केंद्री मंत्री अरूण यादव होरें अज्ज बुरहानपुर च चुनां प्रचार कीता। उनें भारतीय जनता पार्टी पर बेरोजगारी ते महंगाई जनेह मुद्दें सवां ध्यान फरकाइयै विवादित मुद्दे पुट्टदे दा दोष लाया।

<><><><><><>

Haryana Congress List

कांग्रेस नै हरियाणा च लोकसभा चुनां लेई अपने 8एं मेदवारें दे नाएं दी पैहली सूची दी घोषणा करी दिती ऐ। पार्टी राज्य दी 10एं लोकसभा सीटें चा 9एं पर चुनां लड़ा करदी ऐ। आम आदमी पार्टी

जेड़ी इंडिया गठबंधन दी भ्याल ऐ कुरूक्षेत्र सीटा पर चुनां लड़ा करदी ऐ। कांग्रेस नै अंबाला सवां वरूण चौधरी, सतपाल ब्रह्मचारी होरें गी सोनीपत, मौजूदा राज्यसभा सांसद ते साबका मुखमंत्री हुंदे पुत्र भूपिंद्र सिंह हुड्डा होरें गी रोहतक सवां पार्टी दा मेदवार बनाया ऐ। भिवानी महेंद्र गढ़ सवां राव दान सिंह ते फरीदाबाद सवां महेंद्र प्रताप होरें गी टिकट दित्ता गेआ ऐ। कांग्रेस नै एल्लै तोड़ी गुरूग्राम सवां अपने मेदवारें दे नां दा ऐलान नेई कीता ऐ।

<><><><><><>

TCM BSF

पश्चिम बंगाल च किश घटनाएं गी छोड़ियै दार्जिलिंग, बालूरघाट ते रायगंट हल्के च मतदान रमानदारी कन्नै होई गेआ। तृणमूल कांग्रेस नै दोष लाया जे बीएसएफ किश मतदान केंद्रें पर मतदाताएं गी प्रभावित करा करदी ऐ। दुए पास्से बीएसएफ नै इस दावे गी खारिज करी दित्ता ऐ ते आखेआ ऐ जे मतदान केंद्रें पर बीएसएफ दे अमले गी तैनात नेई कीता गेदा ऐ। बीएसएफ नै तृणमूल कांग्रेस दे दावे गी झूठा करार दित्ता ऐ।

<><><><><><>



Zero tolerance

रक्षा सचिव गिरिधर अरमाने होरें शंघाई साथ सहयोग संगठन दे मेम्बर मुखें दे विकास ते खुशहाली लेई हर चाल्ली दे आतंकवाद गी भलेआं गै नेइ बर्दाश्त करने दी जरूरत पर जोर पाया ऐ। श्री अरमाने होरें कजाकिस्तान दे अस्ताना च शंघाई साथ सहयोग संगठन दे मेम्बर मुखें दे रक्षा मंत्रियें कन्नै लग्गी दी इक मीटिंग च एह गल्ल आकखी। इस मीटिंग दौरान उनें एससीओ क्षेत्र च अमन-शांति बनाई रक्खने, स्थिरता ते सुरक्षा लेई भारत दे धेइयै गी दोहराया। रक्षा सचिव होरें अंतरराष्ट्रीय आतंकवाद बारै संयुक्त राष्ट्र च व्यापक कन्वेंशन दी चिरें सवां कीती जा करदी भारत दी तजबीज दा बी जिक्र कीता। उनं हिंद प्रशांत क्षेत्र लेई सब्बनं इलाकें दी सुरक्षा ते तरक्की आहले भारत दे तजबीज कीते गेदे विचार पर बी गल्ल कीती।



Shah-UCC

केंद्री गृह मंत्री अमित शाह होरें अज्ज आखेआ जे केंद्र च बीजेपी दी अगुवाई च चला रदी सरकार आस्सेआ देशा च वी.सी.सी लागू कीता

जाग जेहड़ी प्रधानमंत्री नरेंद्र मोदी हुंदी गरंटी ऐ। उनें पर्सनल लाज दी वकालत करने लेई कांग्रेस दी नुक्ताचीनी कीती। शाह होरें मध्य प्रदेश च गुना लोकसभा हल्के च केंद्री मंत्री ज्योतिरादित्य सिंधिया हुंदे समर्थन च कीती गेदी रैली च बोलदे होई आख्ेआ जे उत्तराखंड आंगर पूरे देशा च समान नागरिक संहिता यानि यू.सी.सी लागू कीती जाग। उनें अग्गे आखेआ जे मोदी सरकार नै देशा थमां नक्सलवाद ते आतंकवाद गी खत्म करने दे अलावा दफा 370 गी बी खत्म कीता ऐ।

<><><><><><>